

# Kontuola

ANTZUOLA / Egubakoitza / 2004eko uztailaren 16a / 210. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02


## GOITBko jaietako programa berezia ikusi ahal izango dugu

AINTZANE IRIZAR

Jaietako ekitaldi askotan ikusiko ditugu oraingo asteburuan GOITBko kamerak. Izan ere, datorren asterako Antzuolako jaien gaineko programa berezia egingo dute. Aurten, gainera, herritar askok izango du bere etxean programa hori ikusteko aukera.

Dagoeneko Antzuolako hainbat etxebizitzatan ikusten dute GOITB. Orain dela aste batzuk jarri zuen GOITBk antena Antzuolan, Altzeta baserriaren ondoan, hain zuzen ere. Beste etxebizitza batzuetan, baina, oraindik ezin dute Goiena Telebista ikusi. Kontua da antena kolektiboa duten etxebizitza-multzoetan 40. kanalerako anplifikadorea jarri behar dela. Anplifikadore hori edozein instalatzailek jarri dezake eta ez da garestia izaten, kontuan hartuta bizilagun guztien artean ordaindu behar dela. Antena arrunten kasuan, berriz, nahikoa da telebista sintonizatzearekin.

Antzuolako Udaleko eta Goienako arduradunek esan digutenez, Jaurlaritzak antenen kudeaketarako duen enpresa-



ARTIBOIA

Jaien gaineko programa berezia ikusteko aukera izango dugu astelehenean eta eguaztenean.

rekin dihardute negoziatzen baimen eta ordainketa kontuak. Horregatik, oraindik ez dago baimen ofizialik, baina, espero dute laster izango dituztela baimen guztiak.

**ASTELEHENEAN, PROGRAMA BEREZIA**  
Gauzak horrela, herritar askok izango du aukera GOITBk astelehenean emitituko duen jaien gaineko programa berezia ikusteko. Astelehenean, hilak 19,

gaueko hamarretan ikusi ahal izango dugu programa hori. Eguaztenean, berriz, errepikapena botako dute, 20:30ean. Antzuolako jaietara errepasoa egingo diote programa horretan.

**HERRITARREN HITZA** / Patxi Olabarria • Langilea

## Mairua pateran

**A**lkateak jaietako agurrean hauxe esan digu: "Urtebete Udalean pasa ondoren ilusio eta proiektuz beteta jarraitzen dugu Antzuolaren etorkizunerako". Esaldi borobila! Gertu Gaeko hiru zinegotziak baztertzeko ilusiorik behintzat ez dute falta. Gero hitz politekin *Goienkaria*-n idazten dute Gertu Gae inongo oztoporik gabe dagoela Udalean. Inongo oztoporik gabe? Goizeko zortietan lanordutan plenoa jartzea ez al da oztopoa? Plenotan galdetu behar duguna hiru egun lehenago esan behar izatea ez al da oztopoa? Gainera, gure zine-

gotzi postua bereganatu zuenaren dimisioaren errudunak gu garela diote. Mehatxuak egon direla diote, ondo dakitenean inongo mehatxurik ez dela izan.

Alkateak proiektuz beteta daudela esaten duenean bete-betean asmatzen du. Urtebete honetan proiektuak aurkeztea besterik ez dute egin. Lehenengo aurkezpenean Txabarri ekarri zuten. Handik gutxira, proiektu



**"Urtebete honetan proiektuak aurkeztu besterik ez dute egin"**

hauek alde batera laga eta beste batzuk aurkezteko ez zuten Txabarri ekarri. Eta orain, bigarren proiektu hauek ahaztu eta hirugarren batzuk dituzte esku artean; hala ere, badirudi ez dutela hirugarren aurkezpen publikorik egingo, herritar gehienak kontra daude eta.

Laburbilduz, hauxe da oraingo proiektuen asmoa: kanpo gorrian 50 etxebi-

zitza kalzadorearekin sartu eta horko etxeekin espekulatuz ateratako diruarekin Sagastiko zelaigunean, parkea egin beharrean, kultur etxea egin. Baina lasai, beste eraikin honen teilatuan berdegunea jarriko dute! Ideia ona da berdeguneak berreskuratzeko etxeetan teila berdeak jartzea.

Eta hau guztia gutxi balitz, herriko plazatik erreka zabalik egitekoak omen dira. Datorren urtean beharbada mairua astoan joan beharrean errekan behera pateran etorriko zaigu, beste mairu asko Afrikatik Europara etortzen den bezala.

## LABUR

### Valdejunquerakoak etorriko dira zapatuan jaietara

Valdejunquerako Muez herriko ordezkariek etorriko dira bihar, zapatua, herrira. Urrian herriko erretiratuak egon ziren hantxe, eta plaka bat jarri zuten Valdejunquerako bataila gogoratzeko. Bihar Udalak plaka bat eman go die eta Alardea ikusteko aukera izango dute.

### AKEk urteko batzarra egin du oraingo astean

Martitzenean, hilak 13, egin zuen urteko batzar orokorra Antzuola Kirol Elkarteak. Hantxe, besteak beste, datorren denboraldiari begira erregional mailako taldea osatzeko izango dituzten zailtasunen gainean berba egin zuten kirol elkarte arduradunek.

### Frontoi bideko kantoian piboteak jarriko dituzte

Frontoi bideko kantoian hainbat pibote jarriko dituzte. Udalen helburua da kanto hori oinezkoendako bidea izatea. Gainera, autoen zirkulaziorako gune arriskutsua izan da beti toki hori. Emergentsietarako eta kasu jakinetarako bakarrik kendu ahal izango dira piboteak.

### Paper eta kartoi edukiontzia gainezka egon da

Astelehenera arte gainezka egon da Sagastiko kartoi edukiontzia. Edukiontzia beteta zegoenez, jendea kartoiak kanpoan lagatzen hasi zen. Hainbat bizilagunek esan digunez, edukiontzia hustu zuten, baina, kanpoan zeuden kartoiak hantxe laga zituzten. Dagoeneko horrelakorik berriro ez gertatzea eskatzen diote.



## ELKARRIZKETA

ANDOITZ PEÑAGARIKANO/VILARIÑOEN LAGUNTZAILEA

# "Vilariñorekin lan egitea ikasteko aukera paregabea da niretako; haren mekanikoari laguntzen ibiltzen naiz"

A.I.


Ingeniaritza Mekanikoa ikasten dihardu Andoitzek. Unibertsitateko ikasketekin batera, Vilariñoren tailerlean ere jarduten du; tailerreko mekaniko profesionalari laguntzen ibiltzen da Olaberriako tailerlean.

**Andres Vilariñori laguntzen ibiltzen zara. Zer lan egiten duzu?**

Andresen eta Angela bere alabaren autoak zaintzen eta konpontzen laguntzen diot mekanikoari. Olaberriko, kart zirkuituaren ondoan daukate tailerra, eta mekaniko profesional batek lan egiten du hantxe. Ni berari laguntzera joaten naiz, astean behin. Lan konplexurik ez dut egiten, baina, ikasteko aukera paregabea da niretako.

**Zela sortu zitzaizun aukerak hori?**

Gure aita mekanikoa izan zen gaztetan eta Andres Vilariñore-



A.I.

*"Ingeniaritza Mekanikoa ikasten dihardut, eta autoen ekipo baten lan egin nahiko nuke"*

kin harremana zeukan. Andresek mekaniko gazte batekin lanean hastea nahi zuen; aitak berarekin berba egin zuen eta horrelaxe hasi nintzen. Egia esan, ez da lan bat; zaletasun moduan nabil.

**Zelatan sortu zitzaizun autoekiko zaletasuna?**

Esan bezala, aita pilotoen mekanikoa izan zen, auto-zale amorratua da-eta. Niri beragandik datorkit motorraren munduarekiko zaletasuna.

**Zeuk parte hartu izan duzu lasterketetan?**

Ez; gainera, diru asko behar da horretarako.

**Lasterketa askotara joan izan zara, ezta?**

Kataluniako rallya ikusten egon naiz, Lleidako auto-krosa, Formula 1eko lasterketak... Bai, bai, ahal dudanean joaten naiz lasterketak ikustera, asko gustatzen zait.

**Orain ikasten diharduzu. Zer ikasten duzu?**

Ingeniaritza mekanikoa. Mondragon Unibertsitateak Ander Vilariñoren ekipoarekin hitzarmena sinatu zuen, Azkoitiko ikerketa zentroan proiektua egiteko. Horretan sartzeko esperantza neukan, baina, hitzarmena bertan behera geratu da.

**Pentsatzen dut mundu hone-tan lan egin nahiko zenukeela, ezta?**

Nire betiko ametsa da autoen ekiporen bateko mekaniko izatea. Oso zaila da hortik bizitzea, baina, horixe da nire ametsa. Euskal Herriatik kanpora errazagoa da. Katalunian, esaterako, asko bultzatzen dute motorraren mundua.



## Zubi berria zabaldu dute

Kalegoian, Tellerianeko eta Txasioneako etxeak eraitsi dituzte oraingo astean. Txasioneako etxeari zutik laga dizkiote bi fatxada. Bi etxe horiek eraitsita, etxebizitza berriak egingo dituzte hantxe.

Bestalde, Buztinzuri eta Ondarre artean egin duten zubi berria oraingo astean bertan zabaldu dute.

Gauzak horrela, azkenaldian izugarri aldatu da Buztinzuri ingurua. Zubi berriarekin, kale horretako urbanizazio lanak amaitu dituzte./A.I.


## LABUR

### Zaborra biltzeko egunak aldatu egin dituzte jaietarako

Egunotan herriko jaiak direla eta, zaborra jasotzeko egunak aldatu egin ditu Antzuolan Debagoieneko Mankomunitateak, herritarren beharrei erantzuteko.

Gaur, egubakoitza, etzi, domeka, eta datorren astelehenetan eta martitzenean pasatuko dira zaborra batzera.

Udalak herritarrei eskatu die zaborra jasotzeko egun berriok zeintzuk diren kontuan hartzea zaborra ater ahal izatzeko.



SAIO BEREZIA GOIENA TELEBISTAN

## Antzuolako jaiak 2004

Uztailaren 19an, astelehena, 22:00etan

**Goitb**  
Goiena Telebista

**Ikustekoa!**